

G E N E S I S.

thair ni thu feirbhis: agus 'nuair a bhios an uachdrapachd agad, 'an sin brisidh tu a chuing o d' mhuineal.

41 Agus dh'fhuathaich Esau Iacob air son a' bheannachaidh leis an do bheannaich athair e: agus thubhairt Esau 'na chridhe, Tha lài a' bhròin air son m'athar am fagus, agus 'an sin marbhaidh mi mo bhràthair Iacob.

42 Agus dh'innseadh do Rebecah briathran Esau a mic bu fhine, agus chuir i teachdaire uaithe^a, agus ghairm i air Iacob a mac a b' òige, agus thubhairt i ris, Feuch, *tha* do bhràthair Esau toirt co'-fhurtachd dha féin a d' thaobh-sa, a' cur roimhe do mharbhadh.

43 Anis uime sin, a mhic, éisd re m' ghuth, agus éirich, teich-sa dh'ionnsuidh mo bhràthar Labain do Haran.

44 Agus fanaidh tu maille ris beagan do laithibh, gus an tionndaidh^b fraoch feirge^c do bhràthar;

45 Gus an tionndaidh corruich do bhràthar uait, agus gu'n di-chuimhnich e na rinn thu air: 'an sin cuiridh mise *fios*, agus bheir mi a sin thu. C'ar son a chaillin le chéile sibh ann an aon là?

46 Agus thubhairt Rebecah re h-Isaac, Tha mi sgìth do m' bheatha air son nigheana Het: ma ghabhas Iacob bean do nigheanaibh Het, mar iadfan *a ta* do nigheanaibh na dùthcha, ciod am math a ni mo bheatha dhomhsa?

C A I B. XXVIII.

A GUS ghairm Isaac air Iacob, agus bheannaich fe

e, agus dh'aithn e dha, agus thubhairt e ris, Cha ghabh thu bean do nigheanaibh Chanaain.

2 Éirich, imich do Phadan-aram, do thigh Bhetueil athar do mhàthar, agus gabh dhuit féin as sin bean do nigheanaibh Labain, bràthar do mhàthar.

3 Agus gu beannaicheadh Dia uile-chumhachdach thu, agus gu deanadh e sìolmhor thu, agus gu d'thugadh e ort fàs lionmhor, air chor as gu'm bi thu a'd' cho'-chruinneachadh chinneach^d:

4 Agus gu d'thugadh e dhuit beannachadh Abraham, dhuit-se, agus do d' fhliochd maille riut; chum gu'n sealbhaich thu 'm fearann 'sam bheil thu a'd' choigreach, a thug Dia do Abraham.

5 Agus chuir Isaac air falbh Iacob, agus chaidh e do Phadan-aram, gu Laban, mac Bhetueil an t-Sirianaich, bràthair Rebecah, màthar Iacoib agus Esau.

6 'Nuair a chunnaic Esau gu'n do bheannaich Isaac Iacob, agus gu'n do chuir e air falbh e do Phadan-aram, a ghabhail mnà dha féin as sin; agus 'nuair a bheannaich fe e, gu'n d'thug e àithne dha, ag ràdh, Cha ghabh thu bean do nigheanaibh Chanaain;

7 Agus gu'n d'éisd Iacob^e r'a athair, agus r'a mhàthair, agus gu'n deachaidh e do Phadan-aram.

8 Agus 'nuair a chunnaic Esau nach do thaitinn nigheana Chanaain r'a athair Isaac;

9 'An sin chaidh Esau dh'ionnsuidh Ismaeil, agus ghabh e Mahalat

^a chuir i *fios* uaipe.

^b traogh.

^c lasan feirge.

^d a'd' iomadaigh.